



VERSCHNUUFFER

www.verschnuuffer.ch

Fasnacht 2022 Y G-SEE S NÜMM

Das keibe Gschyss mit dääne G!
Das ha-n-ych langsam wirgglig gsee!
Zerscht wäge dääne G-Antenne,
denn, well De muesch zum Impfe renne.
Doch langsam wird s mir wirgglig z bunt:
Ob 5G au bi Covid kunnt?

Hesch das mit dääne G aich duss?
Bisch 2G oder 2G plus?
Syt 3G hesch muesch duurend penne?
Hesch 4G bisch e Fungg-Antenne!
Hesch Du z vyyl G no mag Dy kain,
das merggt au der 5G-Verain.

Hän d G en Yfluss uf Dy Händy?
Bringt d Fasnacht jetz die tödlig Wändi?
Bisch boosteret oder G-nese
no darfsch mit Mundschutz in e Chaise!
Isch s Ganz am Änd Behörde gmacht?
Die teschte so gärn ihri Macht!

S herrscht Willkür und es stinggt zum Himmel
me zwingt ys zum Hygiene-Fimmell!
Y ka die keibe G nümm gsee,
die G-Form macht de Auge weh!
S git numme ai G, wo me schetzt:
s isch das, wo me mit Pünggtli setzt...

S het jeede mit däm Gschyss sy Mieh
und kasch Di däm doch nid entzieh!
S isch glych eb längs dänggsch oder queer
am Schluss dänggt jeede: „Läng mer s Gweer!“
De machsch es mit, au wenn s Dir stinggt
obwohl Dy froggsch: „Eb s das äggscht bringt?“

S bringt Covid fiire, wie me tiggt,
und wär, wo, wie politisch liggt.
S sin Äxtra-Toure nid gärn gsee,
das duet em “Djoker” bsunders weh!
Mir sitze zämme in aim Boot,
drum wäält au Dytschland wider Rot.

De outisch Di mit Dyne G:
Bisch aifach? Dopplet oder mee?
Bisch positiv oder gar skeptisch?
Pass uff, sunsch wirtsch am Änd no septisch!
Me-n-isch sich ainig: s isch nid cool,
liggsch uf em Buuch e Schluuch im Muul!

Der IQ isch mit G verlinkt.
S isch logisch, dass es allne stinggt.
De Geegner isch s Ganz sehr suschpäggt
die weere sich drum ganz diräggt.
De Deppe lüpfts der Alu-Huet:
hän s Gfüül mir finde Lockdown guet!

Dangg Covid wird me soziophob!
Mutiersch dur d Impfig äggscht zum Schwoob?
Hesch noo der Impfig no e Wille?
Ka me Di druff per Knopfdrugg kille?
D Verschwöörer sin im Paradies
und machen aim gärn s Lääbe mies!

Dur d Covid App wirtsch duurend träggt.
Bisch suuber, oder bisch verdräggt?
Das ka aim d App grad sofort saage,
die gseet: duesch dusche oder baade!
Die mäldet, wo me-n-aane goot,
und wäggslet denn vo Grien zue Rot!

Zem Aaloss kenne kontrolliere
duet me der Zuegang limitiere.
Wenn D wotsch derby syy, mäldsch Di aa
und machsch an Arm e Bündel dra!
Und plötzlich schluggsch und dänggsch: Aha!
Das het me z Dytschland au scho gha...

S git Fasnacht – das isch wunderbar!
S sin d Reegle uns zwar nid ganz klar:
De muesch für d Fasnacht z Basel syy
und grieggsch vo 1 bis 5 kai Wyy.
Es isch ys glych, was denn no goot.
Wenn s nur am Määntig Vieri schloot!

Bisch e Kind, mechtsch Fasnacht mache,
denn git's kaini halbe Sache!
So schrib denn unsere Obmaa aa
und mäld Di gschwind zem Yyschtoo aa.

Mir fraie uns uff di!

Fir Informatione mäldsch Di bim Obmaa
Pascal Studer: gnepf@verschnuuffer.ch